

四庫全書薈要·乾隆御覽本

集部

欽定四庫全書薈要

集部

御定歷代賦彙卷一百

二十九



御定歷代賦彙卷一百十九

草木

著賦

晉

傅玄

惟  
道  
主

秋而堅貞雖離霜而未彫與潛龜乎通靈於是原極以  
道握形以度以類萬物之情以通天下之故豈唯終始  
於事業乃參天而倚數棄原野之蕭條升雲階而內御

運茲莖於掌握交象形而星布信鈎深而致遠實開物而成務

神著賦

以天生神物用配靈照為韻

唐

康子玉

神著之用兮誠稟靈於自然惟神也適變之義至惟用也極數之理全鈎深孰云乎莖短藏密彌彰於德圓再三則蒙捨我而懼濟五十以學由我而樂天揲之而雖隱必索保之而其靜愈專易之重者胡可比焉原夫質稟精純叢分愛對覆青雲以表奇伏玄龜而克配佐爾

筮之貞吉觀我生之進退知微知章而可期何思何慮  
而或昧於是命彼筮人擇乎上春韞之而必致其用揲  
之而爰動其神感以洗心遂通端策之志執之指掌空  
啗握策之倫禮事其儀易贊其妙探彼幽蹟觀其祕要  
皆多假爾之能必叶窮神之照將欲觀貞諒無與京乾  
道變化而悟神明幽贊而生原始要終思盡性於大衍  
知來數往翼明彖於小成非我無以昭效法之道非我  
無以稽作易之情於以致百慮於以類萬物象四時四

十九數而有常推三才三百六旬而不拂惟著之用惟神是聽運不窮而或變通其志而遂寧且提攜而成列有感應而協靈滋而後數布之而可辨生而成象審之而必形何一卉之時育配十朋之天縱恥紅蘭之見鋤鄙白茅之藉用則知夫著之可貴也庶類安能而共之哉

著草賦

有序

元

楊維禎

予比年以來喪訟病患交侵並集毗陵孟侯宗鎮屢為

予布策筮之無以謝不敏退而作著賦且復作憂釋以  
自廣此又予之心著也

客有靈氛手執筮兮惠而告我草之靈兮上蔡之野少  
室陽兮孕毓陰陽葆元精兮仁風旁翼甘露零兮神龜  
下守紫霧騰兮熒熒煒煒盈百莖兮辟易神姦贊幽明  
兮收厥枯茲復精氣兮擇賢而畀稽疑志兮韜以纁帛  
阜囊閔兮納於積中北床置兮捷策定數發貞悔兮粵  
若定策肇羲皇兮歷代是寶假有常兮相乎靈龜孰短

長兮塗山之兆夏后王兮百穀之筮周室昌兮國家將  
興必有祥兮神幾發動亦孔彰兮大哉聖人參天地兮  
鬼神吉凶不相悖兮何智有所不勝人有所不逮兮畫  
方者矩畫圓者規兮嗟彼枯莖物有所濟兮爾有大疑  
謀及筮兮我聞其言如醉醒兮我有大疑所未明兮  
請索萑茅為余正兮盜蹠考命顏闕生兮陽虎據位  
孔卒行兮或弱冠司袞而七十食牛兮或三葉皓首  
而七世珥貂兮或死滅以賂而宮以幽兮或捐印俱



走而閣以投兮姣好嫫女惡孟姬兮寶器康瓠擲天  
璆兮玄柜焚棄鉤吻以為羞兮吁嗟乎幹流迴穴紛  
推遷兮禍福去就我不知其然兮於是靈氛端策為  
余占兮卦遇玄鳥曰道無慊兮汝獨修潔衆皆貪婪  
兮毋驚爾直而罔爾廉兮天其未定天懵懵兮亦既  
有定靡弗勝兮逍遙自然與道息兮毋惑所不通確  
守而則兮占言唯吉玄鳥白兮再拜吉占服之無斃  
兮

靈茅賦

唐

呂巖說

有靈茅之繁育稟堪輿之粹晶間叢薄以孕彩候韶  
陽之發生與百卉而同氣擅三脊而異名糅纖條以  
為族枝連茹以纍征蔓延亭皋鋪敷原陸白華霜淨  
翠莖雲沃雜春澗之長松亂寒潭之明菊不翦彰帝  
堯之儉緼袍識子騫之服若乃蒼蔚匝地低昂順風  
或結根於江漢之澳或蓄苗於嶺岫之中挺芳心兮  
尊尊吐修葉兮叢叢煙霞之所蕩拂昆蟲之所翳蒙

納日月之光照資露雨之霑融東市驗左生之術南  
征紀周王之功嘉此物之為用蓋今昔之攸同至若  
錫履於齊俾侯於魯頌容衛之所藉實禮儀之攸覩  
純束美夫詩人縮酒貢其任土宜有意於遺芳諒無  
替於終古茅之為物也賤尚見采於先王士之所貴  
者道豈敢昧於文章慕朝宗之涓滴對詞林而抑揚  
若邦國之是賴希寄心於棟梁

江淮獻三脊茅賦

以國有盛禮靈唐  
茅三脊為類

獨孤授

茅有衆靈名之為盛雖百代以呈質終三脊以居正每  
彰封禪之期如受鬼神之神命生於古既光七十之君獻  
於今更表千里之聖出於淮甸來彼江潭使馳於北星  
流於南極執而有嚴有翼緘滕而再四再三及夫覩至  
尊呈大國致於金華之上啓於瑤池之側施陳而百瑞  
慙容撫翫而千官變色美其出有常地生必舊形非成  
野鹿之禮寧假澄酒之馨超常倫而薦闕殊衆品而實  
庭理盡三分似叶通三之化體皆一類欲明得一之靈

隱見之時吉蠲中禮獨標珍草之狀悉皆兄弟之體整  
齊而玉匣遙傳潔靜而瓊華新啓應盛禮而居首表常  
度而為後道未格也雖有采而必無獄可封焉縱不求  
而自有觀王者之得失知禮事之臧否且夫玉帛廣矣  
何尚於茅豈不以貴稱三脊重載六爻始彙征於吳楚  
終遍藉於陶匏奉上之時且報云亭之兆升中之後因  
知天地之交吾皇由是命太史詔宗伯議封山謀勒石  
備文物與禮器修玉函與金策使聖功登於九天靈茅

光於三脊使臣稽首稱萬壽以旋役

拔茅賦

以靈茅類  
征吉為韻

唐

路

蕩

披大易而探蹟偉立言之杳冥惟乾坤之交泰獲品物  
之流形惟卦也泰之義廣惟卉也茅之性靈其用也潔  
身而白當春也應候而青或茂江國或生楚郊三脊之  
異是稱靈茅刺其無禮詩人引之於純束責其不入諸  
侯終貢於厥包不然者草則多矣胡著之於繫艾哉故  
可比君子喻物類惟人也能同其地人易心則兩苦茅

分族則雙悴苟連茹以相依夫何往而不利是則傳其  
潔守其貞榮落惟運窮通曷情道或屯蒙滋雨露而育  
質時逢振拔與連類而共征確乎莫移以保貞吉用之  
錫命既著之夏典將以縮酒又薦於周室異芝蘭之稟  
性不用其香等葵藿之有心尚思向日歲聿云暮霜風  
慘慄願當蕪沒之時不棄輕微之質

徵包茅賦

以九合諸侯一匡天下為韻

唐

路蕩

猗彼菁茅挺生不雜縮醪醴以致潔與清明而相合荆

人是職將有體其精誠王澤不流遂無聞於賦納故小  
白仗義夾輔衰周言念彤弓玄矢實征九伯五侯惟包  
茅之有闕乃伊人之所羞爾貢或愆於先職王祭誠非  
於異求有命是遵雖云我疆理無思不服孰曰風馬牛  
於是戒徒無譁命衆以律顧爾心之有二諒我德之惟  
一楚子承檣以請罪夷吾將事而靡失陳師鞠旅見旌  
旆之翩翩伏軾致辭想德音之秩秩且曰祭有百籩縮  
酒為先類生芻而比潔同有奠以告虔職貢斯已爾則



不共於命馨香罔薦我將謫見於天豈可徂爾車徒侍  
乃封守慢上則君臣異等黷兵則齊楚非偶議乎品列  
我則齒兄弟之二三揆以疆場我則吞蠻荆之八九是  
以來求獻捷豈敢定居如憂連茹而亡禍之大者乃將  
任土作貢禮可忽諸於以止戈寰區折衝醜孽倖潔白  
於染醜肅君臣於上下太壇之禮成彼菁菁者茅問罪  
之師罔倦悠悠於野然彼率職四方用賓於王信耀德  
於千祀豈矜功以一匡異魯隱觀魚以犯憲笑晉文將

狩以亂常曷若返行葦之積德遵方物之舊章美哉無私之舉也將歷代而彌光

艾賦

陳  
孔蕃之

良藥弗達妙鍼莫宣奇艾急病靡身挺煙治匪君臣得用神火振淹固於有爛氣絕息乎無假淳建投而招崇鉗椒擣而貽禍伊茲艾之淑粹仍索質於中野嗟乎貞灰與邪燼迭御芳煙與苦蘭競薰是以艾正而賤蘭妖而珍故言堯則桀對舉蘭則艾因

艾人賦

以懸艾為人以  
穰毒氣為韻

唐  
陳章

採彼艾兮及此佳辰標至靈以衛物因善救以成人當  
戶而居惡莠言兮結舌負牆而立甘菜色以安身異發  
能以求舊方止惡以知新原夫生亦有涯寂然沒齒盈  
腰雖賤於楚客奮臂若威乎厲鬼苟三年之疾雖云來  
者可追而五日為期豈復怨乎不以蓬頭亦取其容直  
萬目似存乎深視行止於百姓之病雖云具體而微育  
材於萬物之靈必見盡瘁以俟直躬不墜邪氣可禳每

表先生之候善為君子之防類宗則之初來一朝而獲  
順夏正之聚蓄久要不忘終躡虛而挂戶爰撫實以升  
堂想在野之時豈謂生無根柢及得門之後如其自有  
肝腸列名號於冰臺載典常於玉燭免繩持而過惡因  
草創而成俗以枝葉為膚革之胞藉麻絲為筋骨之屬  
待時而用益彰惟爾之能不怒而威詎可比予于毒起  
自蒿萊之下處乎軒屏之前奉百藥而首出展四肢而  
脉連異萱草之忘憂孰云言樹等匏瓜之不食焉肯徒

懸藹爾端容森然屏氣逾芻狗而善御並木奴而為貴  
雖雷奔電激寧聞乎危者使傾而暑往寒來亦見乎後  
生可畏故得擎蘭莫比懸葦未奇委質而桐君是錄焚  
軀而介子相隨宜爾室家略備詩人之採不祈土地雅  
同儒者之為及夫氣散於中貌萎於外弔時匪謂其徼  
福焦思亦齊乎遠害斯人也而有斯疾見靈溝之靈艾

迷迭香賦

有序

魏文帝

余種迷迭於中庭嘉其揚條吐香馥有令芳乃為之賦

曰

坐中堂以遊觀兮覽芳草之樹庭重妙葉於纖枝兮揚  
修幹而結莖承靈露以潤根兮嘉日月而敷榮隨迴風  
以搖動兮吐芬氣之穠清薄西夷之穢俗兮越萬里而  
來征豈衆卉之足方兮信希世而特生

迷迭香賦

魏

曹植

播西都之麗草兮應青春而凝暉流翠葉於纖柯兮結  
微根於丹墀信繁華之速實兮弗見凋於嚴霜方暮秋

之幽蘭兮麗崑崙之芝英既經時而收采兮遂幽殺以  
增芳去枝葉而特御兮入綃縠之霧裳附玉體以行止  
兮順微風而舒光

迷迭香賦

魏  
應瑒

列中堂之嚴宇跨階序而駢羅建茂莖以竦立擢脩幹  
而承阿燭白日之炎陰承翠碧之繁柯朝敷條以誕節  
夕結秀而垂華振纖枝之翠粲動綵葉之萋萋舒芳香  
之酷烈乘清風以徘徊

迷迭香賦

魏  
王  
粲

惟遐方之珍草兮產崑崙之極幽受中和之正氣兮承  
陰陽之靈休揚豐馨於西裔兮布和種於中州去原野  
之側陋兮植高宇之外庭布萋萋之茂葉兮挺苒苒之  
柔莖色光潤而采發兮似孔翠之揚精

鬱金賦

晉  
傅  
玄

葉萋萋兮翠青英蘊蘊而金黃樹掩藹以成蔭氣芬馥  
而含芳凌蘇合之殊珍豈艾納之足方榮曜帝寓香播



紫宮吐芬揚烈萬里望風

芸香賦

有序

晉傅咸

先君作芸香賦詞美高麗有覩斯卉蔚茂馨香同遊使  
余為賦

攜昵友以逍遙兮覽偉草之敷英慕君子之弘覆兮超  
託軀於朱庭俯引澤於丹壤兮仰汲潤乎泰清繁茲綠  
茁茂此翠莖葉芰從以纖折兮枝婀娜以迴縈象春松  
之含曜兮鬱翁蔚以蔥菁

東天竺賦

有序

梁程譽

中大同元年秋河東柳惲為秘書監譽以散騎為之貳  
離校之暇情甚相狎監署西廡有異草數本綠莖疎節  
葉膏如翦朱實離離炳如渥丹惲為譽言西真書號此  
為東天竺其說曰軒轅帝鑄鼎南湖百神受職東海少  
君以是為獻且白帝云女媧用以鍊石補天試以拂水  
水為中斷試以御風風為之息金石水火洞達無闕帝  
異焉命植於蓬壺之圃此其遺狀也然不復如向時之

驗矣。嘗怪斯言誕而不經，因竊嘆曰：物固有弱而剛微，而彰當其時也；雷轟而騎，翔非其時也；穴蟠而泥藏，豈特斯草也？感而作賦云。

彤庭赫兮弘敞，入端闈而延顧。粵若望直之都，旁開羣玉之府。則有芸裒湘素，蘭翳軒廡。琳琅曳風，瓊玫泣雨。誠神明之輿壤，乃尤物之所處。是何弱植之蔑蒙兮，榦如剖璞之玉葉。碎出藍之綠色，含朱膏實。正秋熟受中地腴，號東天竺。蓋女媧補有蒼之缺，公孫佩遐升之錄。

來自西海植之蓬圃飛廉為之輟御馮夷為之止舞於  
斯時也神農未知藥后稷未播穀莫英尚晦萐莆猶伏  
芝混菌耳苓羣狼毒神禹所未識齊諧所未悉亦既擢  
質於神皋之苑獻名於通靈之室矣爾乃芳掩茝若氣  
矜資當密東霞綴駢羅星光菁茅海鳧不足以侔潔簷  
荀薰陸不足以襲香璫璨於九闈之上而容與乎三階  
之旁者也時異事改貌存質昧孰知無用之用而不為  
斯世之所采畦並稂莠隰兼蒿艾王田植表則有燔芴

之酷樵豎載歌則有蒸薪之悔文異溝中之斷音乖爨  
下之桐心類飛灰首如飛蓬豈非有意於上林之積翠  
而禁籞之搗紅者哉天嘉昌明萬物咸覩姬姜在御不  
棄翹楚王鮪登庖旁徵魴鱉曾是散材托茲邃宇卿雲  
甘露之所濡白日陽春之所曜天雞晨翔銅枝夜照儻  
窮年之若斯敢捨攘於往操願黽勉於鴻私蹠青箱而  
就稿

採藥賦

有序

唐  
陸龜蒙

葯白芷也香草美人得以比之君子定情屬思聊為賦  
云

日正融冷春歸飾荒觀一時之流恨撫萬古之遺香問  
人則不屈不索說地則非瀟非湘摹其榮煙攜而動色  
擢其體雪擬而騰光諷畔牢愁子雲於焉華皓吟哀時  
命曼倩由是摧藏情思矜年慵情畏晚胡繩繫晷以難  
駐揭車載春而不返陋君折楊柳須為送行陋君採笑  
蓉仍勞贈遠豈如陰晴互出雅豔相迎隈回鳳喜怨盼

鴻驚侍笑者青琴作號顧謂者碧玉為名偷襲積競繁  
盈目斜波而水怯鬢疊葉而雲爭蘭在口以時聞嬌如  
連瑣蕙牽心而不定飄若懸旌契叩難申融怡自許石  
能潛遁以求偶山亦浮來而命侶誓不為巖阿竹冉冉  
孤生誓不為澗底松亭亭獨處於是欺皓本掩縮蕤房  
紅者自破蒂縹者誰披望懷沙之浦詠遺襟之詞煙分  
而麝墨猶濕綺斷而龍刀合知只言長信長門年年可  
恨未必傾城傾國箇箇生悲臨階躑躅以虛徐當戶薈

薇兮綽約蜂乍葉而先盡鶯躡枝而易落未若北堂公

子樹芳草忘憂南國佳人佩生香辟惡露茁煙冶風條

翠詭不知海傍之期遠不信人間之命薄休為上計掾

空尋寶釵聊作侍中郎且乘金絡別有廬江小吏蜀郡

長卿或支離而築恨或調笑以衷情不同乎稟簪裙而

霧悄秉禮義以霜明鄭交甫則江邊佩解萼綠華則席

上詩成彼怡神而致問皆護節而含貞竦懼趨前雖陳

辭而往想遷延却立終結抱而難平淚滴堪穿腸迴好



繫蟲絲織怨以成段象酒蠲愁而判劑江僕射之孤燈  
向壁不少淒迷張記室之少婦當壚應還細麗景方駘  
蕩思已低摧酒疲於子建為使花困於靈均作媒何庶  
物之相負痛妍華而未回莫與心傷瑤圃從驚鷓鴣如  
防膽怯空屏宜畫魁堆刺欲追尋徒嗟緬邈杯形連理  
而終在扇樣合歡而可學若遇劉公伯雅夢亦沉沉如  
逢王母少兒晝還數數

石菖蒲賦

有序

宋

張耒

歲十月冰霜大寒吾庭之植物無不悴者爰有瓦缶置  
水斗許間以小石有草鬱然俯窺其根與石相結絡其  
生意暢遂顏色茂好若夏雨解穉之竹春田時澤之苗  
問其名曰是為石菖蒲也考諸本草則為養性上藥仙  
聖之已試者也因賦之云

歲寒風霜水落石潔大木百圍偃仆摧折有草於此寸  
根九節曾是莫傷葦然茂悅若處廣深隱與密而不知  
戶牖之外平地尺雪也將麋而餌之私其益於我躬則

不幾於奪也曷若致之吾前儀之以自修兮庶乎此德之踞玦也

石菖蒲賦

有序

宋  
王炎

予書室中有石菖蒲一本鬱然暢茂蓋資水石之清幽以遂其性此物醫經所論可以延年可以成仙第人取而食之蒲喪其生矣然則為人養生者非蒲之願也因讀北山翁集有石菖蒲賦一篇三折四復詞既妙麗而興託高遠乃拾其遺論而賦之曰

老石嶙峋金鐵貞兮浮雲所根氣潛蒸兮下漱冽泉玉  
鏘鳴兮蹙節盤屈託以生兮附堅涵潤密如積兮四時  
青青不改色兮烈日凝冰無能厄兮潛蓄幽馨如有德  
兮后土富媪載品彙兮其秀其英拔類萃兮虬髯者松  
負勁氣兮惟竹虚心古君子兮蘭有國香儕高士兮梅  
也如玉勝靜女兮得土則繁否則悴兮獨根於石孰如  
蒲之精粹兮有行有藻產漣漪兮可薦可修播聲詩兮  
亦有芙蓉媚芳池兮紅衣素裳美且都兮下視其本着

淤泥兮潔淨不污孰如蒲之清癯兮來自澗谷入吾室  
兮鑿石瀦水保翁鬱兮零露宵泣珠的皦兮甘雨時濯  
緇塵滌兮中心愛之久無數兮方士者流言可餐兮養  
心益髓將引年兮一寸九節可登仙兮帝經君籙其言  
然兮予乃獻疑進末議兮彭聃最壽終亦逝兮喬松飛  
昇兮安在兮屑而餌之蒲何罪兮毀璞雕刻玉不幸兮  
枯骨抱易龜隕命兮破為犧樽木失性兮彼美維蒲吾  
良朋兮前有韋編後黃庭兮全真育和共欣榮兮優游

卒歲淡然其忘情兮

雁來紅賦

有序

明楊慎

此弘治甲子余十七歲時作近得其稿錄於此

蜀城之花與玉蟬而同房漢宮之菊配黃鵠以分裳茲  
織莖兮獨異候陽鳥而敷芳盈盈渥赭奕奕鮮粧承景  
火旻之下委質金神之鄉吳臺草長紅心不同時節楚  
岸楓愁赤葉遠謝輝煌迎風動彩泣露生光耿夫容兮  
瀕枉渚雜桂蕊兮侍君堂殘蝶留連而驚豔胡蜂躑躅

而疑香矜隕霜之不殺笑何草之不黃脫梧楸兮索索  
銷蘭蕙兮揚揚琅玕摧兮好樹簫籟響兮長廊柳呈疎  
兮綺陌荷委蓋兮銀塘矯兮紅蕖爛然朱芳賞生兮稀  
有物珍兮非常誤停車之杜牧詫剪綵之隋皇江淹多  
才擬抽毫而賦詠班姬含怨亦却扇而傍徨亂曰春花  
紅兮杜宇春草碧兮萇弘茲微生兮秋穎乃借榮於春  
工根伴兮寒蠶名托兮霄鴻彼游龍兮杖杜亦詩人兮  
為風採佳名於飾羽聊以貽夫雕蟲

御定歷代賦彙卷一百十九



御定歷代賦彙卷一百二十

草木

薺賦

晉

夏侯湛

寒冬之日余登乎城跬步乎北園覩衆草之萎悴覽林  
果之零殘悲纖條之槁摧慙枯葉之飄殫見芳薺之時  
生被哇疇而獨繁鑽重冰而挺茂蒙嚴霜以發鮮含盛  
陽而弗萌在太陰而斯育永安性於猛寒差無寧乎煖

燠齊精氣於款冬均貞固乎松竹

園葵賦

宋

鮑

昭

風暖凌開土昌泉動游塵曝日鳴雉依隴主人拂黃冠  
拭藜杖布疏種平圻壤通畔修直膏畝夷敞白莖紫蒂  
豚耳鴨掌溝東陌西行三畦兩既區既鉏乃露乃映勾  
萌欲伸叢牙將放爾乃晨露夕陰霏雲四委沈雷遠震  
飛雨輕灑徐未及晞疾而不靡柔苒爰秀剛甲以解稚  
葉萍布弱陰競抽萋萋翼翼沃沃油油下葳蕤而被逕

上參差而覆疇承朝陽之麗景得傾柯之所投仕非魯  
相有不拔之利賓非二仲無逸馬之憂顧董茶而莫偶  
豈蘋藻之薦羞若乃鄰老譚稼女媪歸桑拂此葦席炊  
彼糝梁甃壺援醞曲瓢卷漿乃羹乃淪堆鼎盈筐甘旨  
精脆柔滑芬芳消淋逐水潤胃調腸於是既飫徹盤投  
筯回小人之腹為君子之慮近觀物運遠訪師聖聲教  
後彰律理前定烏非黔黑鶴豈浴淨彼圖行而方止固  
得之於天性伊冬簞而夏裘無雙功而並盛蕩然任心

樂道安命春風夕來秋日晨映獨酌南軒擁琴孤聽  
篇章間作以歌以詠魚深沉而鳥高飛孰知美色之  
為正

金燈草賦

梁江淹

山華綺錯陸葉錦名金燈麗草鑄氣含英若其碧莖凌  
露玉根升霜翠葉暮媚紫榮晨光非錦罽之可學詎瓊  
瑾之能方迺御秋風之獨秀值秋露之餘芬出萬枝而  
更明冠衆蘄而不羣既豔溢於時暮方照麗於霜分是

以移馥蘭畹徙色曲池軼長洲兮杜若跨幽渚兮芳籬  
映霞光而爍燭懷風氣而參差故植君玉臺生君椒室  
笑萼耀天朱英亂日永緒恨於君前遺風霜之蕭瑟藉  
綺帳與羅袿信草木之願畢

書帶草賦

唐  
陸龜蒙

彼碧者草云書帶名先儒既沒後代還生有味非甘莫  
共三山芝校無香可媚難將九畹蘭爭叨詞林畔種在  
經苑中榮翠影臨波恐被芙蓉見鄙貞姿傍砌愁為芍

藥相輕發葉抽英因天受性紛稚圭池上之宅拂仲蔚  
門前之徑不省教施異術安得返魂未嘗輒入明庭何  
當指佞幾臨寒日幸到青春莎草未傳於漁父蒲茸竊  
詠於詩人霜亦曾露潘令偏知白薤風常遍起宋生惟  
道青蘋栽培只倚於賢鄰寒樹長憂乎稚戲出慙無用  
舒還有異當琴操發伯牙山水之情值儒編動鑿齒陽  
秋之思敢曰求友寧忘慕義吳娃楫上空羨苔滋魏主  
帷中惟通蕙氣或乃蘭榮越徼薰茂周原幽搜莫及

興詠徒存此則對仲舉蕭疎之室處子山搖落之園  
不識深宮豈是曾為帝女非侵遠道誰言能憶王孫  
徒愛其斂疎煙披曉露弱可攬結勻能布復蕭蕭而  
不計榮枯漠漠而何干好惡金燈照灼尚驚秦帝之  
焚粉蝶留連真謂羽陵之蠹爾乃高推籬菊瑞許階  
奠我則惟親志士每聚流螢豈便離蒿萊於隙地希  
杜若於遙汀儻遇翰林主人之一顧庶長保於青

青

吉祥草賦

有序

元  
任士林

吉祥草酷似蘭而踈秀海國有其種率云十歲一花然  
鮮有見者余過僧智傳之室見一本紫莖而花莖纔二  
寸綴花數十似瑞香而斂小近翫之有香氣傳且謂余  
曰種且十五年矣今纔一開感係之餘賦以自廣  
睽靈姿之幽絕蔓天竺之化城挺纖踈之奇植負吉祥  
之嘉名孰化滋於下土亶見擢於衲僧方其根移露本  
盆壅春膏擬紫莖之逞瑞伉蘭蕙於亭皋然而朝培夕



溉十有五暮春風秋露日以披滋卒深韜而重發何堅  
忍而舒遲諒得天之獨厚不驟悅於時宜候半世之力  
深迺舒英而揚暉噫嘻江路微暖野梅漏枝駘蕩未透  
宮楊綰絲木俟夏而叢綠葉迎秋而飄飛含英之本麗  
土之支孰不聽造化之鼓舞候氣母之推移肯耐靜於  
寒暑不跂榮於既萎噫嘻甯越之學請三十年文公之  
伯十九載而迤邐彼長沙之誼之寧志於初歲玉樓之  
賀無靜心於早慧一發泄而輒衰萬不成而敗繼余嘗

感人事於河清之期悟城非於鶴歸之世三竊枕而人  
未知年屢變海而悵其東逝蹇美草之感余起余衷之  
繆計尚深根以需榮倘來時之未艾諒就木之歎婦又  
安能訪此花之開閉

庭莎賦

有序

唐

蕭頴士

天寶十載予以史臣推擇待詔闕下僻直多忤連歲不  
偶未選叙求參河南府軍事府尹裴公以予浮名枉顧  
遇焉而尹之外姻或綰紀綱之局怙勢矜權求府僚降

禮於已予清慎自守不能附會爰逝我陳嫌怒遂構又  
同官多貴遊右戚酒食之會絲竹之娛無間旬朔予人  
質鄙野雅不之好常願鷗鳥為儔江海是處往歲久遊  
剡中將遂終焉朝旨迫召故不獲展著白鵬賦以寄斯  
意至是鬱悒彌用增想廳階之下蹊有莎草故參軍宋  
之問徙於伊川而植焉結根五紀緜幕庭際廣累萬步  
高樹十餘間以雜果陰蔽其上俗吏往來必凌踐之歎  
其稟山野之姿而託非其所以就窘迫因而賦曰

厭公門之窘束玩纖草於茲亭奚卑弱之斯極豈雨露  
之愆靈尚含和以順時隨春夏之淒清軒房洞啓廣階  
脩直槐楊蔽虧桃李對植橫層陰之冥密綴繁英之翕  
絕既高低以異姿亦濃淡而殊色胥徒牒訴雜沓乎其  
側遊塵浮煙蒙翳而不息雖蕭颯以自得亦喧卑而見  
逼宜夫坐莽浪之野帶江湖之渌託根山阿搖穎綠水  
芊緜霍靡連亘乎十數里何推遷而連會繆產蒔於庭  
隅憂好尚之傾奪見芟夷於難除既無心於寵辱又奚

議於親疎承竿瀝之甘潤蔽衣衿之曳婁雖為幸於斯  
日諒稟性之云殊聞哲王之布澤迨蕭葦而霑鋪苟一  
類而失所猶納隍之在予矧皇穹之播氣陶庶彙於靈  
樞曷茲卉之攸託慘終年而莫舒吾將徵宰物之至理  
聿歸問於玄虛者焉

青苔賦

有序

梁

江淹

余鑿山楹為室有苔焉意之所之故為是作云

嗟青苔之依依兮無色類而可方必居閒而就寂似幽

意之深傷故其處石則松枯交陰泉雨長注絕磳俯眎  
崩壁仰顧悲凹嶮兮惟流水而馳鶩遂能崎屈上生斑  
駁下布異人貴其貞精道士悅其迴趣咀松屑以高想  
捧丹經而永慕若其在水則鏡帶湖沼錦匣池林春塘  
秀色陽鳥好音青郊未謝兮白日照路貫千里兮綠草  
深迺生水而搖蕩遂出波而沉淫假青條兮總翠借黃  
花兮舒金遊梁之客徒馬疲而不能去兔園之女雖蠶  
飢而不自禁至於脩臺廣廡幽閣閒楹流黃以織琴瑟

且鳴戶牖祕兮不可見履袂動兮覺人聲迺蕪階翠地  
繞壁點牆春禽鳴兮蘭莖紫秋蟲唵兮蕙實黃晝遙遙  
而不暮夜永永以空長零露下兮在梧楸有美人兮歎  
以傷若迺崩隍十仞毀冢萬年當其志力雄雋才圖驕  
堅錦衣被地鞍馬耀天淇上相送江南採蓮妖童出鄭  
美女生燕而頓死豔氣於一旦埋玉玦於窮泉寂兮如  
何苔積網羅視青蘼之杳杳痛百代兮恨多故其所詣  
必感所感必哀哀以情起感以怨來魂慮斷絕精念徘徊

徊者也彼木蘭與豫章既中繩而獲天及薜荔與蘼蕪  
又懷芬而見表至哉青苔之無用吾孰知其多少

青苔賦

有序

唐

王勃

吾之旅遊數月矣憩乎荒澗觀青苔焉緣崖而上迺喟  
然而歎曰嗟乎苔之生於林塘也為幽客之賞苔之生  
於軒庭也為居人之怨斯擇地而處無累於物也愛憎  
從而生遂作賦曰

若夫桂洲含潤松岬秘液繞江曲之寒沙抱巖幽之古



石汎迴塘而積翠縈脩樹而凝碧契山客之寄情諧野  
人之妙適及其瑤房有寂瓊室無光菲微君子之砌蔓  
延君侯之堂引浮青而泛露散輕綵而承霜起金鈿之  
舊感驚玉筋之新行若夫弱質絲幕纖滋布濩措形不  
用之境託跡無人之路望夷險而齊歸在高深而委遇  
惟愛憎之未染何悲歡之詭赴宜其背陽就陰違喧處  
靜不根不蒂無華無影恥桃李之暫芳笑蘭桂之非永  
故順時而不競每乘幽而自整

青苔賦

唐楊炯

粵若稽古聖皇重暉月光開博望之苑闢思賢之堂華  
館三襲凋軒四下地則經省而書坊人則後車而先馬  
相彼草木兮或有足言者吁嗟青苔今可得而聞也借  
如靈山偃蹇巨壁崔嵬畫千峯而錦照圖萬壑而霞開  
王孫遊兮山之隈披薜荔兮踐莓苔悵容與兮徘徊一  
去千年兮時不復來至若圓潭寫鏡方流聚玉苔何水  
而不清水何苔而不綠漁夫遊兮漢川曲歌滄浪兮濯

吾足桂舟橫兮蘭柁觸浦淑遑迴兮心斷續別有崇臺  
廣廈粉壁椒塗梁木蘭兮椽瑋瑁草離合兮樹珊瑚白  
露下蒼苔蕪暗瑤砌澀瓊鋪有美人兮向隅應門閉兮  
踟躕心震蕩兮意不愉顏如玉兮淚如珠請循其本也  
見商羊兮鼓舞召風伯兮電赴占顧兔兮離畢星雷聞  
聞兮雨冥冥皓兮蕩兮見潢汙之滿庭倏兮忽兮視苔  
蘚之青青爾其為狀也羃歷緜密浸淫布濩彬駁兮長  
廊黃緣兮古樹肅兮若遠山之松柏汎兮若平郊之煙

霧春澹蕩兮景物華承芳卉兮藉落花歲崢嶸兮日云  
暮迫寒霜兮犯危露觸類而長其生也蕃莫不文階兮  
鏤瓦碧地兮青垣別生分類西京南越則烏韭兮綠錢  
金苔兮石髮苔之為物也賤苔之為德也深夫其為讓  
也每違燥而居濕其為謙也常背陽而即陰重扃秘宇  
兮不以為顯幽山窮水兮不以為沉有達人卷舒之意  
君子行藏之心惟天地之大德匪予情之所任

浮萍賦

晉

夏侯湛

步長渠以遊目兮覽隨波之微草紛漂漉以澄茂兮羗  
孤生於靈沼因纖根以自滋兮乃逸蕩乎波表散圓葉  
以舒形兮發翠綠以含縹蔭脩魚之華鱗兮翳蘭池之  
清潦既淡澹以順流兮又難容以隨風有纏薄於崖側  
兮或迴滯乎湍中紛上下其靡常兮漂往來其無窮仰  
熙陽曜俯憑綠水渟不安處行無定軌流息則寧濤擾  
則動浮輕善移勢危易盪似孤臣之介立隨排擠之所  
往內一志以奉朝兮外結心以絕黨萍出水而立枯兮

士失據而身枉覩斯草而慷慨兮固知直道之難與

浮萍賦

唐  
常衮

居洪泉而不根植者惟浮萍而已矣不懷芳以賈害不  
銜色以標美動不忤物卑以安已乘流則遊得坻則止  
如識變而知時似委命而順理故能無幽不涉無遠不  
尋隨長汀而自汎值驚浪而不沉既不遷其清濁亦何  
避乎淺深可以明逍遙之意可以警滯着之心然而推  
移河海凌歷隈澳溜緩則去遲水急則浮速秋遇楓浦

與墜葉而齊奔春渡桃源共落花而相逐披拂丹草搖  
演青蘋出入經其潭洞高下歸其龔淪擇利而行有似  
見機之士不常厥所同乎漂梗之人歌曰大江之水東  
西流別有孤萍朝夕浮莫言此中常汎汎終當結實觸  
王舟

浮萍賦

唐  
趙昂

汎汎者萍乘流匪寧殊源比影異沼均形初苒弱兮碕  
岸乍連延兮廣汀映池則草色同翠照日兮苔光共青

霞凝兮片片成玉月上兮處處疑星入門自媚穠李徒  
矜其妖豔取足為樂行潦豈小於滄溟觀其枯華有時  
動靜無必習坎斯止遇亨則逸安卑取順契君子之用  
心揚波隨流豈漁翁之能詰每託鄰於藻荇不混跡於  
蓬蓴與菡萏而相鮮向莓苔而如失寔幽賞之可嘉何  
寓遊之足匹夫物之云云糾纏誰分淡處牆兮或不才  
而見棄蘭生幽也終以香而自焚惟茲萍矣獨擅其美  
謙能居下知則樂水鑿擊芳於楚客寧見羞於舜篋象



虛舟而不繫或倏往而忽來類至人之無心更出生而  
入死噫歎植匪深根長無固蒂將舍之而不芟翦豈見  
用而能種藝鄙朝菌之暫榮笑匏瓜之長繫空慙雨露  
之恩竊愧陶鈞之惠願同蒹葭比玉而見珍託陋質於  
池塘之際

水藻賦

唐

郭元超

遊子行邁登晉山之孤嶽翠谿晶以淪連紅嶂赫兮崩  
駁爾其雲崖委溜風壑鳴泉苔彬彪以冒石藻漫莽兮

山川于以采藻于彼行潦沼沚之毛汙潭之草薶薶靡  
靡汎汎悠悠乍黃緣於春水或累屣於春洲觀其往往  
縈散離離無畔姬娟島嶼煜煜江漢碎流月於澄波隱  
孤雲於斷岸生不擇所長亦無叢不資潤於微露不懼  
威於勁風纖莖璀璨密葉茸茸宿銀塘之白鷺矯清水  
之文虹則知乘流則遊遇坻則植柔而能全弱而能直  
其為隱也不居高而處卑其為謙也常韜光而晦色嗟  
茂族之無託願貞芳之見移生君之銅沼汎君之瑤池

雜青蓮與翠荇偶杜若與江蘺生於水人不知歲歲年年幽澗垂

瓦松賦

有序

唐  
崔融

崇文館瓦松者產於屋雷之上千株萬莖開花吐葉高不及尺下纔如寸不載於仙經靡題於藥錄謂之為木也訪山客而未詳謂之為草也驗農皇而罕記豈不以在人無用在物無成乎俗以其形似松生必依瓦故曰瓦松楊炯謂余曰此中草木咸可為賦其辭曰

賓館兮沉沉明月高兮重海深試一望兮上棟下宇開  
陽闔陰彼美嘉族依於夏屋煌煌特秀狀金芝兮產雷  
歷歷空懸若星榆而種天本尊丰茸青冥芊眠葩條郁  
毓根柢連拳閒青苔而裊露陵碧瓦而含煙春風搖兮  
鬱起冬雪糝兮蒼然詎充採掇罕任雕鐫桐君莫賞梓  
匠難甄用匪適於時要必濫聞於俗傳慙魏宮之烏非  
恧漢宮之紅蓮觀其衆開榮列虛心獨潔高寧我慕無  
木木之五尋卑以自安類石蒲之九節進不必媚居不

求利芳不為人生不因地其質也非無忝於天然其陰也薄纔足以自庇望之常見其表尋之罔得其祕肅穆承華堂皇不賒繩懸麥穗戶刻菱花竹蒼筤而衆色樹連理而相加芙蓉發池兮照爛日及懸雷兮紛葩彼懷寶以遇賞此不材而見嗟雖有慕於階闥亦無混於泥沙已矣哉不學懸蘿附柏直蓬倚麻固將含美惡以同貫齊是非於一家亂曰少陽之地兮於何不春博望之苑兮莫匪正人纖根弱植兮生君之館荷施霑恩兮為

人所翫物不謝生不知其榮惟願聖皇千萬壽但知傾  
葉向時明

瓦松賦

唐  
闕名

式觀圖籍幽山窮野聞卉木之名焉考神農之嘗者根  
莖可驗洪纖不捨惟瓦松兮闕書何昔人兮智寡原其  
所託高而又雅抽形先寄於鶴樓聳質更資於鴛瓦旖  
旒芬葩含風接霞既當春而吐葉亦凌秋而點花異山  
苗之極秀狀澗松兮抽芽高居壤雷匪雜泥沙向朝陽

兮發榮經夕露兮增華常在危簷心必直詎欲牽風影  
暫斜小大殊品高卑異盼離離兮若星榆之昭灼熒熒  
兮疑石蒲之葱蒨既乏棟梁之用寧怯鐫雕之變豈比  
夫桂山上蘭谷中長幽隱兮銷馥為芬芳兮敗叢奚若  
茲物之獨茂無憂患兮養蒙

轉蓬賦

以本根一斷隨風所之為韻

唐

蔣防

彼茁者蓬其生本尊因驚風之動地遂離根而去本委  
順而往異愚夫之守株任運則行叶高人之嘉遯摧弱

質絕陳根始遲遲而徐轉俄忽忽而駿奔體以圓而疾  
質以弱而存凌寒後凋雖有慙於松柏近秋俱敗亦無  
媿於蘭蓀時也玉露為霜金風應律歎芳菲而難久覩  
搖落之不一初宛轉以孤翻漸邈迤而連出度平野而  
暫見映層皋而還失徘徊未已同風葉之辭枝漂蕩不  
停甚水萍之委質若乃慘澹雲晚悠揚日短歲云秋矣  
莖弱者先衰風以動之根危者易斷徒觀其委地離披  
縈吹參差既忘懷於近遠寧繫跡於高卑觸物何情類



虛舟而自汎善行無跡於野馬而相隨豈不以生無固  
蒂轉有長風象車輪未始有極如循環莫知所終遊子  
感而忘歸歎飄居陌上小人見而懷土憶生在麻中矧  
夫依物暫停遇風復舉乍飄揚以歷亂或迴旋而容與  
青蘋之末不起聊可以躊躇黃埃之中自飛孰知其處  
所客有因時結念寓物屬詞觀其哀兮懼老將至矣觀  
其轉也嗟行靡不之撫懷抱起心有之誠驚鬢髮增首  
如之悲儻陽春之可待亦何恨飄飄於此時

冬草賦

梁

蕭子暉

有閒居之蔓草獨幽隱而羅生對離披之苦節反葳蕤  
而有情若夫火山滅焰湯泉沸瀉日悠揚而少色天陰  
霖而四下於時直木先摧曲蓬多隕衆芳摧而萎絕百  
卉頽以徂盡未若茲草凌霜自保挺秀色於冰塗厲貞  
心於寒道已矣哉徒撫心其何益但使萬物之後彫夫  
何獨知於松栢

愍衰草賦

梁

沈約

愍衰草衰草無容色  
顛顛荒徑中寒茲不可識  
昔時兮春日昔日兮春風  
銜華兮佩實垂綠兮散紅  
巖陬兮海岸冰多兮霰積  
布緜密於寒臯吐纖疏於危石  
彫芳卉於九衢寶靈茅之三脊  
風急峭道難秋至客衣單既傷  
簷下菊復悲池上蘭飄落逐風盡  
方知歲早寒流螢暗明燭鴈聲斷  
裁續霜奪莖上紫風銷葉中綠  
秋鴻兮疏引寒鳥兮聚飛徑荒  
寒草合草長荒徑微園庭漸蕪沒  
霜露日沾衣

芳草賦

元  
劉  
詵

策予馬於曠垠兮澹旭日之暄霽爰浮游以蹇芳兮渺  
渺樹乎雲之際荒畹愛而眎兮蘭猗猗兮此何地攬  
長洲之積葑兮紉峭嶼之崇蕙稅馳軼而怡悵兮芬霏  
霏兮襲轡誠樂遊以忘歸兮耿中情之所寄羌王孫之  
翠憶兮啾燕趙之絲吹陳金犧與瓊爵兮理清曲於鬢  
髻傾良辰以行樂兮一日而盡夫百卉涉朝雲與銀浦  
兮夕弄暉兮瓊田捐幽谷之寶瑛兮橫芊綿之青鈿紛

擷擬以盈檐兮咸競秀而鬪妍悅蘭芷之不足以爲芳  
兮獨有取乎康樂之髯蕭燎焚以祀帝兮艾朝進而雜  
佩弄玉鉤之青合兮承朝露於輦輓蹇連昌之金鋪兮  
色落落而薦黛彼胡修而自致兮此獨與世而偈背同  
託根於天地兮終薰蕕之何在耿六合之流徙兮誠若  
異夫憎愛胡不變易以取好兮猶自持而焉待續紛紛  
以雜糅兮曠千古而誰采豈無人而不芳兮獨惕惕以  
自揣情依依而不昧兮雖隤側其孰悔嗟孔聖之援琴

兮撫幽幽兮一傷惟屈子之好修兮襲之以為佩纓既  
聖賢之知心兮又何必求乎舉世之知也雖造化之若  
無所別兮未必醜好之果可以欺也幸年華之未暮兮  
尚可充乎佩幃誠人間之不合兮吾將翹乎清都而薦  
之

懷芳草賦

有序

明  
徐世溥

芳草之稱標自楚辭本草有名者五十六種其他蓋有  
不可悉者矣吳徐無減賦是詩以為一物也余友粵黎

美周欲為賦以辨之余意微名覈實自非妙才必累文  
心因作懷芳草賦以待美周稱懷者不敢專芳草也新  
涼多感聊誌恐遲暮之思云

於時秋也殘暑平退輕風捲衣人氣初斂浮雲未歸遙  
空淡洗四野低垂望難明而匪暮色可辨而偏微白兮  
漠漠碧兮萋萋有客吟秋橫笛登樓玉顏倚曲相憐復  
愁露下香濕煙交翠柔歲蕤兮伺薌澤於襟袖徘徊兮  
遇故物於汀洲似曾相識不忍經行鳥銜不盡馬踏還

生君如不採芳心未明若夫鄭女芍藥楚客江離猗蘭  
當佩揭車可畦蘼蕪山上白芷川湄零陵綠薦豆蔻紅  
栖鬢素馨兮宜頰鬢帶杜蘅兮準腰圍彼采蕭兮一日  
三秋況樹蕙兮百晦千頭種當歸兮欄畔拾留夷於道  
周莫不氣縈妝閣艷繞花鶯紛迷蝶夢逞誘蜂喧雲烘  
翁勃日映羊眠憑來損檻望去穿簾釀資膏沐潤養緜  
絃藏書却蠹籠葉無烟爾乃雨餘風外酒半梳成燭銷  
月暗嚙迴枕清帆投青岸鞭裊紅亭黏天同色匝地殊



名於斯時也氣感心柔目搖魂蕩遊子悔其不返孤臣  
悲其屢放或聞一歎於牕前或步微吟於堤上雖復同  
心攜手流波相媚亦惆悵以如忘乃娉婷兮更倍怨氤  
氲之掩人嗟芳菲其難沫於是占曰藉用白茅灌以鬱  
鬯伊藉茅兮見生稊於枯楊忽飲鬯兮念鬱金之可堂  
有踟躕而拊歌者曰攫瑜瑤璫五木香迷迭艾納及都  
梁本自折贈出遐方心有所懷路未央天涯何處無芳  
草三春何人不斷腸又况乎木葉凋凋蒹葭蒼蒼臨霜

露之極浦擷寒翠而憶煖香者能不淒迷以恍惚躑躅而徬徨乎

春草賦

明 烏斯道

粵稽永嘉舊郡睹謝池里賡謝池吟予自鴈宕倦遊抗志幽尋熟翫斯景長嘯不禁客乃對予而言曰康樂有云池塘生春草園柳變鳴禽先生有心予志之矣於時春也蔚焉成林禽聲未換草色芳深奈牽行役莫遂登臨天涯兄弟惟予知音願賦春草以慰我心予不獲已

賦之何陽律之柔暢乃池塘之發生始抽根以隱隱旋  
布葉而盈盈既搖風兮帶媚復向日兮含榮飛采芳之  
蛺蝶集點水之蜻蜓色映袍其覺重香隨步以疑輕任  
躡蹠而無阻從攬頤而不爭應鶻聲乎淚落依馬足矣  
魂征類愁客之無緒同顰娥之有情乃若氣煦郊原沙  
蒸水岸露意漸斂煙霧初亂延綠兮紗牕流青兮綵幔  
懷人兮志往翫物兮襟散飄落花以無迹裊遊然而不  
斷想舞燕之頻催聽啼鶯之互換則有染翰騷人尋芳

逸史杖懸赤仄囊攜綵綺整折角之素巾躡遠遊之文履指柳陌以嚮導經花堤而徙倚蘚封階而迹絕鼃鬧樹而聲止奈所訪之不逢復何心乎戀此嗟嗟芳草兮愁春芳春兮愁人草隨春而並麗愁逐草而俱新有草愁難歇無愁草不勻草生魂夢際愁動別離辰於是水漲斷橋雲沉祕閣鑪香火寢壁瓢風落蝸黏筆架鳥窺牕格應門幾童載酒何客亮瞻雲之惆悵知倚問之卜度茵展地而靜悄帶臨書而寂寞愁不絕乎池蛙怨豈

忘乎野鶴雖追歡之在後恐對景之非昨可憐哉春日  
兮輝輝春草兮依依草生兮侵徑日落兮掩扉池塘物  
色已如許為問王孫歸不歸客乃喟然而歎曰池上孤  
樓青陰映帶萋萋芳草遠與天界入我揮灑用酬文債  
草榮春盡此文不壞

幽草賦

明  
陳子龍

馮山麓兮望芊芊之北邙春風蕩兮綵渺而碧傷悲柔  
新兮縈心腸怨悄悄兮流娟芳於是紫玉山池韓憑臺

墓相思溪水合歡瑩樹棠梨豔風蕙蘭啼露學纖潤於  
脩眉鬪輕揚於翠羽枝分埋玉之光根展殉香之路潑  
水碧以逝愁染雲藍而煎嫫想其細雨初戢落月半明  
狐拜星隱鬼泣燈橫緝衣光而珮冷飛裙蝶而神輕莫  
不斷魂沉葉集感遙英至若漳水荒臺驪山廢殿浥溫  
泉以豐滋膏紅粉而葱蒨歇雄姿兮青蕪閉玉顏兮綠  
冑沒文砌而藏蜂觸綺牕而巢燕撥玄叢之化衣拾翠  
圓之遺鈿傷故國兮荒莽深追歌舞兮空睇眄又若小

院春閉鶯閨暗思感秀條之間靜攬連心之依垂落流  
蘇而縈帶墮小鬟而膩枝暗藉長門佳人難拾濃鋪輦  
道宮車未期鸚鵡空啄蝴蝶頻移注清眸之別婦留飄  
裙之怨姬至如巫雨通巴湘煙壓楚蘿密披人莎深竄  
鼠望蒙鬱於羈臣沉幽陰於恨侶洗清潭之紫莖蔽奇  
香而不處火煜煜以焚如巫歎歎而祀女點碧血兮江  
皋亂涼魂兮幽渚更有柳邨新織蘭澤初蕤茁嫩煖而  
迎日枝柔和而漾絲嚼鴛鴦於沙芷拂翡翠於香離妖

童蕩漿遊女下騎競習芙蓉之句相傳芍藥之詩河水  
濫濫岸草離離灞澹贈別江漢相思感此悽惻令人忘  
遺何我情之誕愁遇小物而斯滯生死齊憂悲歡同贅  
惟茲草之榮苑任往來於年歲胡觸緒而紛紜盡虛無  
之妍慧是以放志天適解情冥契啜華三山之間採芝  
五嶽之際值荆園而未芟經瑤田而不憩庶幾忘情之  
士滌我傷心之蔽者乎

盆草賦

明  
傅占衡



天生於下澤之阿兮承閒娛而歷茲獲免中庭之歎烈  
兮拂座右之清颺余翦其萋黃之敗族兮爰盆舟而濯  
之當秋陰而媚賞兮忽挺翠以自持延白雲於旭檻兮  
隱明燈於夕帳纖青青其脩立兮宛平楚之在望時憩  
目而留睇靜疲民而不蕩苟徑寸之孤芳亦何羨夫尋  
丈及秋蘭之未佩懷山桂而方遙引王孫以綴席挾中  
丞以為寮心西澗之微吟想離離之下苗雖暫歡於盆  
石亦傷別乎遠條譬飲啄之樊雉徒神王而未驕曾不

得反於雨露之上兮吾將灌以墨池之水飲固潔而不  
貪兮色謝盈而不毀遠脂藥於閨人乎託馨香於君子  
物有處賤而必登兮又奚為乎玉階之視乃為歌曰草  
短短兮來他山異衆華兮松顏或下簾兮閉闕彼幽人  
兮可與之言

莽草賦

有序

明  
靳學顏

予道商顏谷中見莽草橘葉桂莖丹萼素蕾意若自負  
不儔凡卉者厥形麗矣然一葉入吻百內潰裂是何形

情之詭與予始撫而狎之繼知其然委諸絕壑彌歎而  
去旋復自咎夫已既已知矣而不以詔人不仁是草有  
負於造物甚厚不厚誅之不義迺追製此賦示之來喆  
毋若予之始狎之也

豔山兮神丘麗水兮炎洲祥芝兮九葩赤葉兮瑠流既  
採服以返精兮亦練餌而千秋胡茲植之獨戾秉駿氣  
之弗協生百需而無益獨戕物而呈捷紺藹敷芬蒼條  
輪困素苞冒朱縹茸施殷乍斂乍開含嘻含嘖葉不辨

橘莖不分桂業英周柯益津豐媚曰旋樞之流精與皋  
塗之麗卉孰凝爾質俾疑厥類熙榮外揭酷氛內藏危  
鋒誤觸颺迅機張彼太行之陰產紀炎經而已習未若  
茲之可翫貽永感於一吸弄影濫汎之泚托跡蘋藻之  
濱殖中達而揚意挺脩垠而驕神瘖馬飲波倦旅息陰  
將淫毒之有加曾自知其已甚后皇申嘉錫淑慝均化  
光覆露渥涵湛陰陽宣昭明受命誠不遷美利咸各正  
厲滓何偏滯範茲不肖形矜已若不足害物為有羸是

以作賦敬陳明則比物聯類具懲賊德其辭曰秀色可  
餐言若醴飭貌深衷詎測底觀莽草兮類若子覆人邦  
家利舌齒白者膚革黝者理觀莽草兮類若子金石示  
剛脂韋裹覆却色沮觀者鄙觀莽草兮類若子疏節闊  
視澹無滓嫉刻填膚唯有已面而頌兮背而訾觀莽草  
兮類若子

御定歷代賦彙卷一百二十

謹案卷一百十九第十四頁後七行揭車載春而  
不返按此用離騷畦留夷與揭車句刊本揭訛  
曷今據改

第十六頁前二行景方駘蕩刊本方訛芳據甫里  
集改





欽定四庫全書

總校官庶吉士臣張能照

校對官編修臣周厚輅

謄錄監生臣沈東昇

欽定四庫全書薈要

集部

御定歷代賦彙卷一百二十一

御定歷代賦彙卷一百二十一

花果

朝華賦

晉夏侯湛

維東自  
澗神樹之修異實積陽之純精  
蜿潛根以誕節據川壤

以擢莖皎日升而朝華玄景逝而夕零逮明晨而繁沸  
若靜夜之衆星長莖攢起柔條列布濯靈柯於時雨滋  
逸采於豐露灼煌煌以焯焯獨崇朝而達暮於是茂樹

蒼蒼纖枝翩翩潛光玉朗綠葉翠鮮

春花賦

晉王

氏

劉柔妻

千葩粲其昭晰兮百卉蒨而同榮  
蘭圃翹以含芳兮芝薄振而沈馨  
翠穎競臻衆條頻英或異色同形  
或齊芳殊制自然神香不可勝計  
爛若羅宿之垂光灼若隋珠之宵  
列爽若翡翠之羣翔練若珊瑚之  
映月詩人詠以託諷良喻美而光  
德準工女於妙規飾王后之首則

牡丹賦

有序

唐

舒元興

古人言花者牡丹未嘗與焉蓋遁於深山自幽而芳不為貴者所知花則何遇焉天后之鄉西河也有衆香精舍下有牡丹其花特異天后歎上苑之有闕因命移植焉由此京國牡丹日月寢盛今則自禁闥洎官署外延士庶之家瀰漫如四瀆之流不知其止息之地每暮春之月遨遊之士如在焉亦上國繁華之一事也近代文士為歌詩以詠其形容未有能賦之者余獨賦之以極其美或曰子常以丈夫功業自許今則肆情於一花無

乃猶有兒女之心乎余應之曰吾子獨不見張荊州之  
為人乎斯人信丈夫也然吾觀其文集之首有荔枝賦  
焉荔枝信美矣然亦不出一果耳與牡丹何異哉但問  
其所賦之旨何如吾賦牡丹何傷或者不能對而退余  
遂賦以示之

圓玄瑞精有星而景有雲而卿其光下垂遇物流形草  
木得之發為紅英英之甚紅鍾乎牡丹拔類邁倫國香  
欺蘭我研物情次第而觀暮春氣極綠苞如珠清露宵

偃韶光曉驅動盪支節如解凝結百脈融暢氣不可遏  
兀然盛怒如將憤洩淑日披開照曜酷烈美膚膩體萬  
狀皆絕赤者如日白者如月淡者如赭殷者如血向者  
如迎背者如訣拆者如語含者如咽俯者如愁仰者如  
悅裏者如舞側者如跌亞者如醉曲者如折密者如織  
疎者如缺鮮者如濯慘者如別初隴隴而上下次鱗鱗  
而重叠錦衾相覆繡帳連接晴籠晝薰宿霧宵衰或的  
的騰秀或亭亭露竒或颯然如招或儼然如思或帶風

如吟或泣露如悲或重然如縋或爛然如披或迎日擁  
砌或照影臨池或山雞已馴或威鳳將飛其態萬萬胡  
可立辨不窺天府孰得而見乍疑孫武來此教戰其戰  
謂何搖搖纖柯玉欄滿風流霞成波厯階重臺萬朵千  
窠西子南威洛神湘娥或倚或扶朱顏已酡各銜紅釭  
爭顰翠蛾灼灼妖妖逶逶迤迤漢宮三千豔列星河我  
見其少孰云其多弄彩呈妍壓景駢肩席奪銀燭爐昇  
絳煙洞府真人會于羣仙晶瑩往來金釭列錢凝睇相



看曾不晤言未及行雨先驚旱蓮公室侯家列之如麻  
咳唾萬金買此繁華逞恚終日以言相誇列幄庭中步  
障開霞曲廡重梁松篁相加如貯深閨似隔牕紗髻鬢  
息嬌依稀館娃我來覲之如乘仙槎脈脈不語遲遲日  
斜九衢遊人駿馬香車有酒如澠萬坐笙歌一醉是競  
孰知其他我案花品此花第一脫落羣類獨當春日其  
大盈尺其香滿室葉如翠羽擁抱櫛比蕊如金屑妝飾  
淑質玫瑰羞死芍藥自失天桃斂迹穠李慚出躑躅宵

潰木蘭潛逸朱槿灰心紫薇屈膝皆讓其先敢懷憤嫉  
煥乎美乎后土之產物也使其花之如此而偉乎何前  
代寂寞而不聞今則喧然而大來曷草木之命亦有時  
而塞亦有時而開吾欲問汝曷為而生哉汝且不言徒  
留翫以徘徊

牡丹賦

明 徐渭

何名花之盛美稱洛陽為無雙東青州而南越曾不足  
以頡頏茲上代之無聞始絕盛乎皇唐爾其月坡隄上

長壽街東張家園林汾陽宅中當春光之既和藹亭榭  
之載營天宇曠霽兮絲游景物招人而事起彼貴子兮  
王孫戲游龍於流水遶茲葩而密坐藉芳草而靡靡感  
盛年之若斯傷代謝之能幾爾則粉承日華朱含霧雨  
羣蒂如翔交柯如拒凌晨併妝對客不語衛尉出婢子  
於羅幃鄂君擁翠被於江渚當其百蕊千芽照耀朱霞  
綠葉紛紜望之轉賒若儒生之授學列女樂於絳紗迨  
夫背戶迎牕上下薨簷二三作隊矯矯愈鮮飛燕進女

弟於遠條夫人挾三國而朝天錦辦重捲檀心飛屑柔  
鬢夜殷怒苞曉決宛婦姑之反脣似相稽而無說則有  
若盛時合沓諸娣從韓媿以同歸颯焉彫衰漢王放宮  
人而憎別風薦小爽雨委微溫楚妹舞歌於章臺陳后  
泣罷於長門亦有細加巨上慎妃橫逼座之勢紫侍黃  
側班姬抗同輦之尊或勁而昂婕妤當逸熊於上殿或  
翹而望處子窺宋玉於東垣既離以披亦競而駢近不  
極態遠不盡妍大髣髴乎佳麗意所想而隨存奚援引之

數株可罄比而殫論

季秋牡丹賦

有序

宋  
蔡襄

爽秋涉杪扶欄間有牡丹舊栢輒吐芳楨亭亭上擢發  
紅葩一大可徑咫尺角春取勝無間然爾扶欄當彩翠亭  
之右亭屹繇圃之西北隅圃直縣堂之背縣介大江之  
南蓋漢元朔中江都易王上封其子敢為丹陽侯邑於  
蕪湖此其地歟今為太平州筦時河間凌公尹之行再  
暮矣政休賦集又所瀕江英游雅故受署齋代被召將

命者憧憧然率道其疆故觴詠之娛相因無缺及此珍卉馨茂公有異時之貴趣張具高會於其側所謂彩翠亭者酒三行濟陽蔡某醕舉而言曰公走文章聲二紀於茲顛葆幾華位不過禁省二丞官不過萬戶長吏而善禦外物居頗休閒獨以浩博記書稱道聖明為事今是花也韜英和緒揭麗蕭辰時雖後而且大盛意者公其日寢亨會才慮將有所售乎昔騷人取香草美人以媿忠潔之士牡丹者抑其類歟請為公賦之其辭曰

朔羽南翔建杓西宅霜天一清露草皆白悲哉轉涼葉  
於亭皋子悵穠華之間寂均百草之不能秋兮何此花  
天姿之的的使人觀之若披大暑兮臨清湘剝層靈兮  
仰白日厥初槁壤潛春扶欄向夕芳枝舉以融怡絳蕊  
局兮罽屨寶霧宵籠鮮風曉拆麗或中人香可專國刻  
紅炬以烘馥綴丹霞而薦色鬱弗誰語丰茸自持非倚  
瑟之神女抑善賦之文姬俯清都而時下簸晴陽以孤  
嬉霄灑瀚兮排金扉氣硠礪兮張寶帷霓熒煜兮揭朱

旗雲腫隴兮纁衣韞綠跗兮曠修眉姹鮮萼兮伸微辭  
沛怡愉兮新相知眇悽惻兮送將歸桃有援兮溪之曲  
蓮為媒兮澤之湄羌此物之善遠亶夫君之後時君不  
聞佳麗皇州喧繁戚里清籟迢迢名園疊疊綺櫳曉兮  
金鑷聲繡牆明兮雨苔紫嚴霰才歸光風半起於是萬  
蒂駢紅交柯結翠密顏紆餘斜袂輕倚文鴛羣飛鶴錦  
橫被縑蓋攀聯緹裳積委則有妹妹玉人翩翩卿子寶  
鷲過兮飛電珠憶來兮流水擁翫嘉辰笑語成市彼瓊



蕤美英縹葉新蕩羞不得借其餘光矧標揚乎意氣今  
何為兮江之干地之卑兮歲將闌荆蕪比兮霜月寒望  
下苑兮思上蘭嘉本擢兮靈根盤泊淮波兮鮮楚山是  
知元冶一陶昌生萬育無左右先容者淪乎朽株當匠  
石不顧者被之散木譬此花之賦命兮亦節暮而葩獨  
然貴賤反行禍福倚伏其暮也何遽不為貴其獨也庸  
知不為福噫化工物情吾以此卜

幽蘭賦

陳周洪讓

爰有奇特之草產於空崖之地仰鳥路而裁通跡行蹤  
而莫至挺自然之高介豈衆情之服媚寧紉結之可求  
垂延佇之能泊稟造化之均育與卉木而齊致入坦道  
而銷聲屏山幽而靜異獨見識於琴臺竊逢知於綺季

幽蘭賦

唐楊炯

惟幽蘭之芳草稟天地之純精抱青紫之奇色挺龍虎  
之嘉名不起林而獨秀必固本而叢生爾乃丰茸十步  
懸連九畹莖受露而將低香從風而自遠當此之時叢

蘭正滋美庭幃之孝子循南陔而采之楚襄王蘭臺之  
宮零落無叢漢武帝荷蘭之殿荒涼幾變聞昔日之芳  
菲恨今人之不見至若桃花水上佩蘭若而續魂竹箭  
山陰坐蘭亭而開宴江南則蘭澤為洲東海則蘭陵為  
縣隰有蘭兮蘭有枝贈遠別兮交新知氣如蘭兮長不  
改心若蘭兮終不移及夫東山月出西軒日晚受燕女  
於春幃降陳王於秋坂乃有送客金谷林塘坐曛鶴琴  
未罷龍劍將分蘭缸燭耀蘭麝氛氲舞袖迴雪歌聲遏

雲度清夜之未艾酌蘭英以奉君若夫靈均放逐離羣  
散侶亂鄢郢之南都下瀟湘之北渚步遲遲而適越心  
鬱鬱而懷楚徒眷戀於君王斂精神於帝女汀洲兮極  
目芳菲兮襲予思公子兮不言結芳蘭兮延佇借如君  
章有德通神感靈懸車舊館請老山庭白露下而警鶴  
秋風高而亂螢循階除而下望見秋蘭之青青重曰若  
有人兮山之阿紉秋蘭兮歲月多思握之兮猶未得空  
佩之兮欲如何抽琴命操為幽蘭之歌歌曰幽蘭生兮

于彼朝陽含雨露之津潤吸日月之休光美人愁思兮  
採芙蓉於南浦公子忘憂兮樹萱草於北堂雖處幽林  
與窮谷不以無人而不芳趙元淑聞而歎曰昔聞蘭葉  
據龍圖復道蘭林引鳳雛鴻歸燕去紫莖歇露往霜來  
綠葉枯悲秋風之一敗與蒿草而為芻

幽蘭賦

以遠芳襲人終古無絕為韻

唐喬彞

蘭之生兮不以無人而不芳被廣澤森回塘和寡調高  
未儷郢中之曲神符夢叶終傳鄭國之香贈靈修於南

浦襲嘉慶於北堂於是芊眠茂苑靡迤秋坂紉而為佩  
騷人之意已深間以在衿楚客之情何遠薄秋風而香  
盈十步汎皓露則花飛九畹豈衆草之敢陵幸移根之  
未晚若乃吳山清兮天氣新湘水碧兮楓岸春煙轉綠  
蕙波搖白蘋縈曲沼之初蓮遺天涯之美人離別經時  
歎孤芳於秀質豔陽可惜悵獨立於良辰復有映金砌  
羅玉戶分竹宮疏蕙圃因風而起不隨彼茁之蓬擇地  
以生能殊有林之杜宜其比同心於先哲冠美名於前

古蘭之在幽兮其芳滿叢士守業兮其道未通入提攜  
固在於高賞播酷烈當跋於下風寧使彫急景於散地  
迫嚴凝於歲終况復光陰慘烈冰霰淒切靜而處順不  
得近於階墀長未當門獨遣冒於霜雪豔歇紅暗莖萎  
紫折懼鶻鳩之先鳴掩氛氲而頓絕於戲蘭與艾兮異  
味薰與猶兮殊途一室之人雖當執吾之契十年之臭  
尚可攘公之踰囂然此道何有何無嗟乎蘭無薰兮蹇  
擷之所不及士無文兮聲華之所不立儻一借於韶光

庶餘香之可襲

幽蘭賦

以遠芳襲人終古無絕為韻

唐陳有章

翹翹嘉卉獨成國香在深林以挺秀向無人而見芳幽  
之可居達萌芽於陰壑時不可失吐芬香於春陽所以  
紫翹十步名傳九畹自下升高結根聳幹布葉逾密重  
陰未晚開細蕊而乍合擢丹穎而何遠好遵正直生匪  
臨於斜徑不向嶮巖質寧被於長坂獨茂幽壑厭若錯  
薪幾霑雨露猶苦風塵采掇兮有日芳菲兮度春得臨



刈楚之地曷異修詞之人燕妃夢中榮何名而不遂蜀  
琴曲裏奏何聲而不新况衆英聚集傳香氣而相襲佳  
色葱籠帶烟翠而攢叢固已歎夫貞潔期見賞於始終  
幽處斯久照臨忽通喜會無私之日深繫有力之風幽  
莫過於芳蘭誠匪同諸草莽充佩而靈均不棄入握而  
仙都必取詎比夫山上蘼蕪泥中蘅杜將虛名以共播  
竟無善而足數焉知夫光善才於左思能成賦於師古  
而已哉知我者謂我如碩儒不知我者謂我如生芻此

幽人之未已亦何代而云無幸逢昭代得遇良哲雖借  
薰蕕固有分別勿以卉賤不顧幽芬勿以地寒不軫孤  
絕儻折英而入用庶有光於優劣者也

幽蘭賦

以遠芳襲人終古無絕為韻

唐

韓伯庸

陽和布氣兮動植齊光惟彼幽蘭兮偏含國香吐秀喬  
林之下盤根衆草之旁雖無人而見賞且得地而含芳  
於是嫩葉旁開浮香外襲既生成而有分何擬採之莫  
及入握稱美未遭時主之恩納佩為華空載騷人之什

光陰向晚歲月將終芬芳十步之內繁華九畹之中亂  
羣峰兮上下雜百卉兮橫叢况荏苒於光陰將衰敗於  
秋風豈不處地稍幽受氣仍別蕭艾之新苗漸長桃李  
之舊蹊將絕空牽戲蝶拂花蕊之翩翾未遇來人尋芳  
春而採折既生幽徑且任榮枯冪輕煙而蔥翠帶淑氣  
而紛敷冀雨露之溥及何見知之久無及夫日往月來  
時占歲觀遇達人之回盼披荒榛而見取橫琴寫操夫  
子傳之而至今入夢為徵燕姑聞之於前古生雖失處

用乃有因枝條嫩而既麗光色發而猶新雖見辭於下  
土幸因過於仁人則知夫生理未衰採掇何晚幽名得  
而不朽佳氣流而自遠既徵之而見寄願移根於上苑

幽蘭賦

以遠芳襲人終  
古無絕為韻

唐仲子陵

蘭惟國香生彼幽荒貞正內積芬華外揚和氣所資不  
擇地而長精英自得因人而芳况乃崖斷坂折蹊分  
石裂山有木而轉深逕無人而自絕柔條獨秀芳心潛  
結翡翠戲而相鮮靡蕪生而共悅然後衆草之中迥為

一叢卑以自牧和而不同揚翹布葉舒翠錯紅宵承結  
露曉汎光風傾於陽希所照無隱託其地知其道有終  
且求之昔人徵以邃古宛成章於楚客爰命操於尼父  
佩之衆匪蘭不紉曲之多匪蘭奚鼓夫以薰蕕之喻臭  
味斯殊同之則十年猶有異之則一日而無乃清以為  
露滋而為畹比德者以之守貞贈離者以之傷遠宜其  
出幽谷之濱為階除之珍羅堂未晚被逕知春依瑤池  
而自庇與玉樹之為鄰杜若芳芷香辛白蘋俱受生於

大塊獨取象於同人是故蘭也之采伊人所急篇章間  
起比興俱入道之廢可鉏而去道之興可俯而拾為君  
灑微芳於素衿希見寶於重襲

幽蘭賦

以遠芳襲人終  
古無絕為韻

唐

李公進

幽有寂兮蘭有香香者取其服媚寂者契其韜光是以  
綠葉紫莖偶貞士而必佩深林絕壑挺奇質而獨芳觀  
其異綵特秀結根自遠靡生於門寧滋於畹朝陽照而  
雜花不得間其榮光風轉兮衆草無以齊其偃杳杳深

處芬芬絕倫保貞操以擅美發英華以藻春葉凝露以  
珠綴花含烟而色新移於友也則斷金之利樹之庭也  
則如玉之珍豈比夫協夢呈祥表嘉名於鄭國循陔見  
采流雅詠於詩人而已哉蘭之幽芳芳可折幽無人芳  
芳不絕蘭之生芳美自豐生得地芳美無終故雖敗於  
涼飈諒有嘉於前古方比契於松筠詎齊名於蘅杜且  
夫麗白雪之綺靡被長坂之芬敷激餘芳以孤映極幽  
致而自殊則在握者何居擇者何無蘭處幽而轉芳芳

無遠而不襲賢尚晦而必著著何道而不入伊哲人之  
素履蓋徵蘭以自執苟馨香之發聞越江山而采拾

幽蘭賦

有序

宋  
李綱

蘭有二種華以春者似蕙華以秋者似菊楚辭曰秋蘭  
兮青青綠葉兮紫莖又曰春蘭兮秋菊長無絕兮終古  
今世人之所識者素葩叢本特春蘭耳余嘗得一種蘭  
於亡友蕭子寬家綠葉紫莖其香似春蘭而加芳食之  
味尤辛甘可以調羹曹子建七啓於肴饌之妙言紫蘭



丹桂施和必節滋味既殊遺芳射越乃知茲蘭可食其  
為秋蘭無疑也二蘭皆喜生於高山深林閑寂無人之  
境則芬芳郁烈茂盛而遠聞移而置於庭軒房室之間  
不過一再歲花益鮮而香益微蓋其天性如此故古人  
又以幽蘭目之與夫山林隱遯之士耿介高潔不求聞  
達於人而風流自著者亦何以異故感而賦之

相百卉之芳菲兮待培植而乃成何茲蘭之異稟兮處  
幽僻而方興高山崔嵬而巖崱兮深林杳杳以冥冥下

波濤之噴激兮上雪霰之飄零  
邈人跡之不到兮蘭於  
馬而獨馨言茁其芽載擢其英  
春與蕙兮偕秀秋與菊  
兮並榮或素葩而叢本或綠葉而紫莖  
雖春秋之異種  
豈殊德於幽貞耿介自許芬芳誰與久而不知其香  
晦而不改其度榮何謝於光風瘁何傷於白露配芝桂以  
為友奚蕭艾之能侶類同心之契合比明德之欣附淑  
人君子愛而不忘蒸以為藉沐以為湯紉之為佩刈之  
為防實有取於雅操匪徒慕夫國香若夫出自故山同

夫小草資耳目之嘉玩供園林之幽討雖得託於孤根  
蓋已違其所好譬猶高潔之士隱遯之人蹈山林而長  
往友麋鹿而同羣付功名於脫屣等富貴於浮雲室雖  
邇而人則遠可得聞而不可見有泉石之枕漱無猿鶴  
之驚怨晦其跡而彌芳懷其道而愈顯子真谷口德公  
鹿門二子食薇於首陽四皓采芝於商山名與實兮兼  
茂心與跡兮俱閑播清芬於今古亦何以異於幽蘭

幽蘭賦

有序

宋

高似孫

蘭曾伴屈大夫政復何恨然非屈大夫無知蘭者余固非知蘭亦非知大夫者後五百年或有知余者焉

皇以度而揆余兮宛貞貞而孔安含素光以致蠲兮考幽人之所槃澹羣動而不競兮約洵美而且閑嫺孤風之脩脩兮幾激貪而律頑一既分而為乾兮老羣星之芒寒又一索而坤動兮百嘉熾而多蕃余乃持其神秀兮成天地之所難陵高姿以吐妙兮抱幽古而遐觀峭夷齊之特立兮非盜蹠之可姦懿西子之孤靚兮豈嫫

母之並歡彼金磔之自珍兮有瓊壘之獨利又蒿蕪之  
盛蔚兮幸蘅若之未殘兮明水以薦芳子三沐浴乎清  
澗耿積雪其如素兮尚有知余寸丹眇洞庭之始波兮  
木舞葉其珊珊凍沅湘而欲合兮騁白蘋而渺漫招帝  
子而不來兮棄余璫於江干導微馨以輸誠兮律九歌  
其銷菟

秋蘭賦

有序

宋 高似孫

客有遺余秋蘭者比家山所毓尤清瘠特香味稍減豈

涼未深耶系之以辭

眇銀渚之如傾兮訊宵涼之方幼  
倣有風之西香兮竦孤貞之俄秀  
宛青葉而紫莖兮花四三叢且瘦  
心兩兩而一知兮驚汝我之俱舊  
吁靈均之有靈兮炯不死而猶壽  
九其歌之迢迢兮豈韶勺之可奏  
洞庭波而舞葉兮菊英英而趨茂  
何獨憐此幽深兮了非聞而非嗅  
杳渚北之雲興兮帝子澹乎先後  
擷後芳而薦嘉兮叫湘皋而寒溜  
余既莫之偶兮律遺聲而孰扣  
勺明水以酬

君兮耿斯意之不可又君亦裴回而忘歸兮指蘅荃而  
將授余更曰芳之克肖兮豈氛凡之能垢不然易其何  
言兮今琅琅乎其臭

伊蘭賦

有序

明  
楊慎

江陽有花名賽蘭香不足於豔而有餘於香戴之髮紒  
經旬猶馨意古者紉佩之用頰浴之具必此物也西域  
有伊蘭以為佛供即此漢書所謂伊蒲之供也從而為  
之賦曰

英英有蘭猗猗其美謚以伊蘭實自邛始維蘭之品粵  
繁有叢曰蕙曰蓀錯還丰茸曰芷曰茝名殊物同形如  
蒲萱益逮是薦謠俗攸珍乃蘭之質可佩可紉服之媚  
人昔號國香今茲曷湮宜湯宜浴陳除新沃昔聞其語  
今茲則懃先正誓蘭謂識之艱山谷致疑晦翁屢歎懿  
若卉之挺生子何理美而琦絕既歲蕤以晞暘子亦辰  
岑而帶岳友射干而偕生子朋荔挺而俱發漱玄英之  
朝澤兮應復至之陽月秉菘蓋之粵榮兮擅芳菲之酷



烈開以景風之淑辰兮貫乎星回之火節漱沆瀣之芳  
潤兮全朱明之炎德匪直十步之有芳兮曾驗經旬之  
未歇乃有娥媯掩嫫靡曼熒昭步步移豔笑笑傾城子  
夫興於鬢髮昭儀寵於體馨曳步搖之馥郁映角犀之  
豐盈若蘭機迴文之錦季蘭琴綠綺之聲爰色授而魂  
與且目眩而心縈倭墮梁家之髻浮渲韋孃之纓咸纖  
指兮爭擬並巧粲兮相迎都梁蟾蜍兮闕爾而減價虎  
蒲龍棗兮瞳乎其亡菁超旃檀於雪域壓迷迭於雲清

星芒當晝而弗隱金粟未秋而先成埒瑤華兮玉蕊叶  
綠葉兮紫莖堪納涼於玄圃思御風子蓬瀛詎數秋紅  
之簡子豈顧晚翠之長卿爰感子兮體物遂錫子以嘉  
名重為系曰肇允嘉卉兮昉自炎皇媿人之佩兮王者  
之香深谷逶迤兮無人自芳宣尼息騶兮屈平纍湘晨  
月秋風兮屬國之堂洪波霜晚兮謫仙之鄉紉遺佩捐  
兮庸亦何傷體物濯亮兮聊以相羊

藏芝賦

有序

宋  
王令

丙申歲自四月至六月大雨而余之所客天長縣東北  
皆瀕湖澤地浸以下頗以水為患傷草木多死邑居無  
薪芻而益貴薪益來自遠以余之所居則薪之自北來  
者常售於余間而有得若枯華斷穎根梗蒂芥支離擁  
腫與碩實所異於常草者皆取以戲就其中嘗試視之  
余得則芝也折傷不完計之於全此當一葉耳不知其  
他安在也其生雖不知遠近要皆在縣之北以常負薪  
之所來則芝從可知也示人則不齊有由是而知有芝

有由是而信為芝有雖得是而弗之信者然芝之為物  
不常有而或出可愛者也自古詩之作見於今者凡三  
百篇其以風賦比興而附見於物若蘋蘩薇蕨荇芎藭  
藿萸唐菖蘧瓠匏瓜葛鬱蓼葵藿葍葍葍葍葍葍葍葍葍  
蓬莠芊蒿長蒲萑葦葭蕭艾稂莠著芑禾麻菽麥黍  
稷豆叔秬秠糜粟稻粱菅苧卷耳芣苢菁莪葍葍荷華  
游龍茹蘆芍藥之類雜見並出然此特草耳其多蓋如  
此而未嘗及芝也自詩而下長辭章而善自託者獨有

屈原今其離騷九歌具存而可考然其況意所及自詩人所紀之外復益以江蘿芙蓉杜若薜荔木蘭白蘋菖萸揭車蕙芷菡菊艾蘅藿葳蕤施蕪葍蓀而地所常產目所同識之草盡矣若夫陳忠而直私忿廢而怨逐託於彼而取此以見義此則余之所知至於道則余不得而一也然稱類已衆而芝復獨遺是誠何故邪說者遂以九歌之三秀為芝余以其不明又其辭曰適山而採之則芝非獨山草蓋未足據信也及觀漢樂歌蓋當時文

工繁人緣飾世治以裁主意耳非有如詩人騷客鬱於中而不得言憑於物而後見者皆非余所好也今余得芝而賦之意皆在於賦序故不道也

庭勾突萌抽蔚擢秀孰非春兮坏培壅埋播漑軋蒔孰非人兮不為常生時見挺出芝則神兮靈榦不阿衆葉類附不孤有鄰兮生莫時期毓無種裔天生德兮芣苢薦庭蘼蕪薦道退野即兮生無本根拔不滯茹無吝惜兮榮而不華槁而不枯莫損益兮茨萊翳陰高出下蔽適

以取容兮朝菌射干齊長並秀德不校同兮荒原穢壤  
棄放委廢若將終兮知者謂誰何為來者似不必逢兮  
困於不知束於薪蘇自信不恥兮摧戕折傷披本斷榦  
禍不自已兮火炎木焚投置不縮知命有止兮偶於自  
生不祈見聞吾與爾已兮

水仙花前賦

有序

宋高似孫

水仙花非花也幽楚窈眇脫去埃滓全如近湘君湘夫  
人離騷大夫與宋玉諸人世無能道花之清明者輒見

乎辭

天以一而生神坎以習而成玄溥沖與以致潤抱孤貞  
以成妍禹何智以能海羲何神而開乾際壑烝之無畔  
壯英心之自仙悲莫悲乎巫咸之鄉哀莫哀乎原胥之  
淵迅英挺以如濯肯徘徊而自憐至若鮫館載綃而凝  
霜貝庭含璣而媚川蒼茫乎三島之接霧杳眇乎十洲  
之滙天雲雨閑霽水空澄鮮一色如磨萬波不顛亦有  
帝女兮泣竹湘君兮鼓絃神妃兮解佩冰夷兮扣舷是



皆凝姿約素挺粹含娟以婉自將以淑相宣芳以氣屬  
妙以辭傳指北渚以將下薄西津而驟旋或奪芳若或  
采佳荃有蘭可餐有蘋可搴於是樂極忘歸塵空失蠲  
萬慮俱泯餘情獨荃扣冰娥以勺斲訪瑤母而潔媼挹  
水星以請命託神祇而垂甄已矣乎超萬劫以自蛻麗  
一徽而獨涓懷琬琰以成潔抱雪霜以為堅叅至道以  
不死秉至精而長年是蓋苞水德之靈長合五行之自  
然者乎

水仙花後賦

有序

宋高似孫

余既作前水仙賦疑不足以滌余之情者乃依稀洛神賦為後辭尚庶幾乎

余從太史游覽山川汎瀟湘下澧沅摩嶷雲息梧煙歲莫天寒僕痛車顛爾乃釋鑣乎菑涯進秣乎芝廬周旋乎荆許騁望乎湘淵於是神疑目駭心離意惻即之懽悅適焉鬢髻覩一美人於水之側乃拊從者而訊之曰汝有識於彼者乎彼何人者甚閑且潔也從者進曰僕

聞茲水之靈曰湘夫人然則太史公之所遇其或是乎  
其形維何僕願聞之余告之曰其狀也皓如鷗輕朗如  
鵲停瑩浸玉潔秀含蘭馨清明兮如閨風之翦雪皎淨  
兮如瑤池之宿月其始來也炯然層冰出蛟壑其徐進  
也粲然清霜宿瓊枝沈詳弗矜燕婉中度不穠不纖非  
怨非訴美色含光輕姿約素瓌容雅態芳澤不汙素質  
窈窕流暉嫵媚抱德貞亮吐心芳蠲婉孌幽靜志泰神  
閑柔於修辭既丰且鮮飭躬被服稽圖合章峨五采之

英珥兮錯九芝之明璫舞碧霓之修帶兮妥英雲之輕  
裝顏有鍊而如灼體非薰而彌香沐媵容之練練乘清  
氣之徜徉於是舒懷肆逸且娛且顰羽蓋翳映翠旌繽  
紛殫金搖之欲墮弓玩晴洲之青蘋余衷耽其靜變兮  
黯澹蕩而馳神媒不靈於締歡兮託湘波以通勤暢中  
靈之胥悟兮捐余璫於水濱懿玉儀之靜莊允約矩而  
應規輕瑤華而不御兮指二南而揚詩謂皎日之可鑒  
兮非暗室之自欺數解佩之風遇兮風嫋嫋而凝思志

貞介而言妙兮誓守禮以將之於是靈修竦然嫵婉徘徊拊孤影以欲翥心將飛而仍回寨蓀憐憐之芳烈燕芷房之玫瑰感幽志之悽激兮喟揚音而彌哀爾乃衆真縹緲並游嘯侶或濟西澨或臨北渚或采幽蘅或茹芳杜約洛川之神妃會巫陰之竒女清莫清乎姮栖愁莫愁乎牛渚婧輕裾之裔裔冷清飈而雲舉體迅飛鴻倣若輕雲流睇橫波餘芳氤氳其度有則不顛不危優柔靡忒必兢必祗溫乎如玉擘兮陸離精采相授羌余其

悲於是川后斂颺水夷却濤龍伯獻珠鮫人貢綃躍三  
虯以指塗蕤蒼芝而夾御雙螭帖其馴乘儼華旂之布  
獲鴛鴦嘯而先驅翡翠翼而齊鶩於是趨彭蠡過洞庭  
洗月轂飛星輶流清聲而吐竒誦坤乾之大經畫三靈  
而不汨潛一意而長醒恍揚袂以如失雪微汎而霑纓  
拊佳期之不來日冉冉而西征負微素之孰寄誰其將  
余英瓊揚清波而微注指潛淵而自驚恍精采之相授  
迄難陳其餘情於是游倦思歸路異神留遺思杳眇寤

寐好迷蹇悠悠而何之指寒川而薄憇蘭菲菲而襲余  
睇碧雲而搖曳信心會而神交豈綢繆之未契竦僕夫  
之傲余命速駕乎蘭柁其毋惑於所悅當承古而為之  
制

水仙花賦

元  
任士林

眇伊人之蟬蛻兮宅清冷以為扉越蓬隔弱窳不知其  
幾千里兮跂余望之忽軒牕之翠碧兮見此綽約之芳  
姿曳青葱之華裾兮倚玉薤之披披逍遙清霜之夕徘徊

徊明月之晨佩乞碧霞衣紉綠雲金杯盥雨玉盤承津  
斟和注淳斟酌天均於時庭空人靜萬竅不作聲沉步  
虛之歌奏杳鈞天之樂江妃具俎以進羞海若克賓而  
酬酢持杜解而未揚想堂中之歡樂余亦洗醴更酌接  
芳蕤而為客縱歌頽然不知天河之既落

水仙花賦

明姚綬

伊昔涪翁夙罹謫逐行邁阻修浮水奔陸方歸與以息  
駕乃燕坐於部屋惟是屋也依高山臨大江影薄高雲



聲飛怒瀧敲宇衡門洞乎八牕式遣懷於吟嘯忽有覩  
乎神媿爾乃乍近乍遙水面微步羅襪生塵綃裳沾露  
腰纖弱蘭脣冶樊素匪揚桂旗匪蹋神魚遽引遽却或  
疾或徐袖翩翩乎婉婉帶繚繞兮舒舒悵數年之獨往  
鄙良夜以鰥居矯望延佇掠盼躊躇汎若斷梗浮猶馮  
虛乃若貼金蓮於玉趾眷茲樂胥於焉爾止瑪瑙坡荒  
仙王祠圯睇梅兄於嶺頭懷礬弟於澗溪進左右而詒  
之曰水上步月彼其仙邪惟竝素質不御鉛華中有金

蕤輕蒙臂紗衝斤暮雨揮霍朝霞爾或見之而豈吾之  
過誇邪左右屏息對曰彼之來斯誠類仙子馨香芬芳  
容光旖旎其綽約也儼藐姑之神其聯娟也齊洛川之  
子初雖瞻馳終莫摹擬是則主人之所見僕輩之所跂  
者也於是之時涪翁啞然而作聲彼人泯然而無迹江  
風惟清江月自白悵悵何之翳翳寢息晨興向明躑躅  
於庭忽幽花之託根依后土以降靈胡然生之太瘦歲  
晏流形宋玉招魂之賦莊周夢蝶之經翁端作詩調同

金石有頃比夕載驗厥跡無被花之懊惱出門一笑而  
橫大江之空碧

御定歷代賦彙卷一百二十一